

**Pwyllgor yr Economi,
Masnach a Materion Gwledig**

**Economy, Trade and
Rural Affairs Committee**

Senedd Cymru

Bae Caerdydd, Caerdydd, CF99 1SN
SeneddEconomi@senedd.cymru
senedd.cymru/SeneddEconomi
0300 200 6565

Welsh Parliament

Cardiff Bay, Cardiff, CF99 1SN
SeneddEconomy@senedd.wales
senedd.wales/SeneddEconomy
0300 200 6565

Lesley Griffiths AS

Y Gweinidog Materion Gwledig a Gogledd Cymru, a'r Trefnydd

30 Mawrth 2022

Annwyl Weinidog,

Fframwaith cyffredin Dros Dro ar Iechyd a Lles Anifeiliaid

Diolch unwaith eto am ddod i gyfarfod y Pwyllgor ar 17 Mawrth ar gyfer gwaith craffu cyffredinol ac i ateb rhai o'm cwestiynau ar broses y fframweithiau cyffredin. Mae'r Pwyllgor hefyd yn ddiolchgar am bresenoldeb swyddogion Llywodraeth Cymru i ddarparu sesiwn friffio dechnegol breifat ar rai fframweithiau y mae'r Pwyllgor wedi'u blaenoriaethu ar gyfer gwaith craffu. Roedd y sesiwn friffio'n ddefnyddiol iawn. O ystyried natur gymhleth a thechnegol y fframweithiau, cytunodd yr Aelodau y byddai'n ddefnyddiol nodi'r cwestiynau a ofynnwyd ganddynt yn breifat eto mewn gohebiaeth, fel y gellir cofnodi ar goedd y cwestiynau a'r ymatebion ac er mwyn hysbysu rhanddeiliaid. Mae'r cwestiynau i'w gweld dan y penawdau isod, gan gynnwys rhai nas cyrhaeddwyd yn ystod y sesiwn friffio. Edrychwn ymlaen at gael eich ymateb ysgrifenedig ar yr holl bwyntiau hyn:

Byddai'r Pwyllgor yn croesawu rhagor o wybodaeth am y canlynol:

Cwmpas y fframwaith

- Mae'r fframwaith yn nodi y bydd holl gyfraith a pholisi iechyd a lles anifeiliaid o fewn cwmpas. Pam mae'n briodol i'r holl newidiadau arfaethedig i gyfraith a pholisi iechyd a lles anifeiliaid fod o fewn cwmpas y fframwaith hwn, hyd yn oed pan fyddai Llywodraeth Cymru wedi cael hyblygrwydd rheoleiddiol yng nghyd-destun yr UE?



- A allwch nodi pa effaith y bydd hyn yn ei chael ar y ffordd y gall y Senedd a Llywodraeth Cymru arfer eu cymhwysedd?
- A allwch nodi sut y mae'r broses ar gyfer gwneud newidiadau i gyfraith a pholisi Cymru ar iechyd a lles anifeiliaid yn wahanol o dan y fframwaith o'i chymharu ag yn ystod aelodaeth o'r UE?

Proses gwneud penderfyniadau yn y fframwaith

- Esbonio sut rydych wedi bod yn gweithio drwy'r fframwaith cyffredin i ystyried newidiadau i gyfraith iechyd a lles anifeiliaid a chytuno arnynt, a sut y mae hyn yn wahanol i'r broses datblygu polisi pan oedd Cymru yn yr UE.
- Mae'r fframwaith yn ei gwneud yn ofynnol bod y llywodraethau'n hysbysu ei gilydd o faterion (gan gynnwys llunio polisiau, cynnig ar gyfer deddfwriaeth, cyhoeddiadau cyhoeddus ac ymatebion brys) cyn gynted ag y cânt eu hystyried, fel y gellir cynnal trafodaethau ar y cyd cyn gwneud penderfyniadau terfynol. Esbonio pa effaith (os o gwbl) rydych yn rhagweld y byddai hyn yn ei chael ar rôl y Senedd a rhanddeiliaid wrth ddatblygu cyfraith a pholisi Cymru?

Rheoli ymwahanu

- Os yw llywodraeth yn cynnig ymwahanu, mae'r fframwaith yn ei gwneud yn ofynnol cynnal asesiad o'r goblygiadau i farchnad fewnol y DU, negodi a gweithredu cytundebau rhyngwladol, a bioddlogelwch. Sut y bydd hyn yn gweithio'n ymarferol?
- Esbonio sut y bydd Llywodraeth Cymru yn parhau i fonitro newidiadau i gyfraith yr UE ar iechyd a lles anifeiliaid ac asesu risgiau a manteision parhau i ddatblygu'n gyfochrog â chyfraith yr UE.
- Esbonio sut y caiff effaith Deddf Marchnad Fewnol y DU ei rheoli yn y fframwaith.
- Mae'r fframwaith yn ei gwneud yn ofynnol bod y llywodraethau'n hysbysu ei gilydd o faterion (gan gynnwys llunio polisiau, cynnig ar gyfer deddfwriaeth, cyhoeddiadau cyhoeddus ac ymatebion brys) cyn gynted ag y cânt eu hystyried, fel y gellir cynnal trafodaethau ar y cyd cyn gwneud penderfyniadau terfynol. Pa effaith a gaiff hyn ar rôl rhanddeiliaid wrth ddatblygu cyfraith a pholisiau yng Nghymru?



- Mae'r fframweithiau'n darparu i gyrrff hyd braich perthnasol gymryd rhan mewn grwpiau penderfynu. Mae rhai o'r cyrff hyn (megis APHA a'r Arolygiaeth Iechyd Pysgod) yn gweithredu yng Nghymru, ond nid ydynt yn atebol yn ffurfiol i Lywodraeth Cymru na'r Senedd. Sut y byddwch yn sicrhau bod cyfrifoldebau a llinellau atebolrwydd cyrff gwahanol yn glir?
- Os yw llywodraeth yn cynnig ymwahanu, mae'r fframwaith yn ei gwneud yn ofynnol cynnal asesiad o'r goblygiadau i farchnad fewnol y DU, negodi a gweithredu cytundebau rhyngwladol, a bioddiogelwch. Pam y mae'r meini prawf hyn wedi'u dewis, a beth fyddai'n digwydd pe bai unrhyw wrthdaro canfyddedig rhyngddynt?
- Pwy fyddai'n cynnal yr asesiad?
- A fyddai rhanddeiliaid yn cael eu cynnwys wrth lunio'r asesiad?
- A fyddai canlyniadau'r asesiad yn cael eu cyhoeddi?

Deddf Marchnad Fewnol y DU 2020

- Pa effaith allai Deddf Marchnad Fewnol y DU 2020 ei chael ar gyfraith Cymru ar iechyd a lles anifeiliaid?
- A ydych yn bwriadu gofyn am eithriadau o'r Ddeddf ar iechyd a lles anifeiliaid?

Yr UE a Gogledd Iwerddon

- A wnewch roi trosolwg o sut y mae cyfraith yr UE a ddargedwir ar iechyd a lles anifeiliaid yng Nghymru wedi newid ers diwedd y cyfnod pontio?
- A wnewch roi trosolwg o'r prif wahaniaethau rhwng cyfraith bresennol yr UE ar iechyd a lles anifeiliaid a'r gyfraith yng Nghymru?
- Sut y byddwch yn parhau i fonitro newidiadau i gyfraith yr UE ar iechyd a lles anifeiliaid ac asesu goblygiadau ymwahanu â'r UE a Gogledd Iwerddon?
- Sut y byddwch yn asesu risgiau a manteision parhau i ddatblygu'n gyfochrog â chyfraith yr UE mewn cymhariaeth â chynnal y sefyllfa bresennol?
- A ydych yn fodlon y bydd y fframweithiau'n darparu ar gyfer ymgysylltiad digonol gan Lywodraeth Cymru mewn trafodaethau drwy'r fframwaith sefydliadol rhwng y DU a'r UE ar iechyd a lles anifeiliaid?



Rhwymedigaethau rhyngwladol

- Mae'r fframwaith yn darparu y bydd yn galluogi'r llywodraethau i ystyried goblygiadau sy'n deillio o fasnach ryngwladol sy'n cael effaith uniongyrchol ar weithrediad Fframwaith Cyffredin. A ydych o'r farn bod hyn yn rhoi digon o gyfle i Lywodraeth Cymru gyfrannu i safbwyntiau'r DU ar a lles anifeiliaid yn ystod negodiadau masnach ryngwladol?
- A allai anghytundebau ar safbwyntiau'r DU mewn negodiadau masnach gael eu huwchgwyfeirio drwy'r fframwaith hwn?

Llywodraethu a datrys anghydfodau

- A ydych o'r farn bod y dull datrys anghydfod yn ddigon cadarn i ateb y diben arfaethedig?
- Mae'r fframwaith yn darparu y dylid gohirio camau gweithredu sy'n destun anghytuno neu anghydfod fel arfer nes y ceir datrysiad. A oes risg y gallai hyn arwain at oedi i ddeddfwriaeth Cymru?
- Pam nad oes terfynau amser wedi'u pennu ar gyfer datrys anghydfodau?

Sut y datblygwyd y fframwaith

- Sut y gwnaeth Llywodraeth Cymru ymgysylltu â rhanddeiliaid ar ddatblygu'r fframwaith?
- Sut y mae'r fframwaith yn adlewyrchu ymatebion rhanddeiliaid yng Nghymru?

Adolygu a diwygio

- Nid yw'r fframwaith hwn yn cynnwys testun safonol a geir mewn fframweithiau eraill ar sut y dylai'r broses adolygu a diwygio weithio. Pam y mae'r testun hwn wedi'i hepgor?
- Sut y bydd y Senedd yn gallu cyfrannu i broses adolygu a diwygio'r fframwaith?

Materion rhyngwladol



- Cadarnhau a fydd trafodaethau ar safbwyntiau Llywodraeth y DU mewn negodiadau masnach sy'n ymwneud ag iechyd a lles anifeiliaid yn cael eu cynnal drwy'r fframwaith.

Cwestiynau eraill

- Mae cysylltiad agos rhwng y fframwaith hwn a fframweithiau cyffredin eraill, yn enwedig diogelwch bwyd a bwyd anifeiliaid a hylendid a diogelu iechyd y cyhoedd a diogelwch iechyd. Sut y bydd y cysylltiadau rhwng y fframweithiau hyn yn cael eu rheoli?
- Mae Pwyllgor Craffu ar Fframweithiau Cyffredin Tŷ'r Arglwyddi wedi tynnu sylw at nifer o wallau ac anghysondebau yn y fframwaith hwn. A allwch esbonio sut rydych yn sicrhau ansawdd dogfennau'r fframwaith cyn i'r Gweinidog gymeradwyo a chyn gwaith craffu gan y Senedd?

Edrychwn ymlaen at drafod fframweithiau cyffredin â chi eto yn y dyfodol agos ond, yn y cyfamser, diolch ymlaen llaw am roi'r wybodaeth ychwanegol y gofynnir amdani uchod. Byddai ymateb erbyn 29 Ebrill o gymorth i'r Pwyllgor.

Cofion cynnes,



Paul Davies AS

Cadeirydd: Pwyllgor yr Economi, Masnach a Materion Gwledig

Croesewir gohebiaeth yn y Gymraeg a'r Saesneg | We welcome correspondence in both Welsh and English.